

周文忠公全集卷七十一

宋廬陵周必大著

邑後學劉 峙重刊

平園續稿卷第三十一

墓誌銘

胡斗南 箕墓誌銘 紹熙五年

紹興十三年高宗皇帝復置國學於行在所四方英俊挾藝求試以萬計江南素號士鄉越明年中選者通一路纔三人而友人胡斗南在焉自是或留肄業或歸省親往來四十年聲譽日聞凡兩浙江湖先進若後生一游成均則知斗南姓名曰是修身安分通經而贍於文者爭願結交人謂釋褐可日月冀而連枉有司中間僅一遇覃恩免舉一以詞賦獲舉造升合試蜀人李賢良厘攷其文第一御史揭榜復疑人數不應式罷去祭酒司業博士正錄無不嗟惜之後值德壽慶八十恩乃授迪功郎監潭州南嶽廟淳熙內禪循修職郎又數年而沒其初終如此今夫學者不知進德修業每考得失於占筮一或連蹇非怨天則尤人惟斗南學成名立自鄉達於國皆曰當然乃獨不然嗚呼可以言命矣君諱箕字斗南其先自秣陵徙廬陵曾祖將仕

郎諒祖鄉貢進士方中考宗古瀘溪王先生庭珪嘗銘其墓君幼而志趣不羣既長貫穿經史尤精於春秋爲文下筆千言衮衮不休間得異書口誦手抄忘寢興已老無倦事親篤孝免父喪櫛衰冠於墓次遇忌日及歲時上塚必哀而服之母太安人陳氏無恙時間歲自學謁告徒步數千里不憚勞諸弟藉君教道皆有聞其弟籍登第不秩不幸早亡君平生介潔廉方一飯不輕就一毫弗妄取服用簡質居無惰容與人交謙恭誠信未嘗戲侮鄉鄰有不善惟恐其知胡氏大族叔父資政殿學士忠簡公帥以嚴正羣從畏憚惟待君加禮君亦有聞必告忠簡公每於廣坐褒稱之風勵其餘生七十三年以紹熙五年六月二日卒娶曾氏安遠令耑之女四子楷模格標伯仲嘗同試春官楷乃再舉文尤高二女適鄉貢進士倪升卿一未行孫男四人黯燮翼燮女四人遺文三十卷三傳會例三十卷孫吳子注解並藏於家諸子卜是年十一月丙申葬吉水縣中鵠鄉溪塘焦坑之原以狀求銘予與君游久知君爲深銘無愧辭銘曰

行著一鄉而能不施於邦文傳於世而利止賓於王惟德之彰惟子孫之昌嗟我斗南庶幾不亡

宣義郎致仕賜紫金魚袋胡公

昌齡墓誌銘 慶元年

江西多名士吉爲冠自吉言之廬陵胡氏爲大族羣從百數多通經工文章守禮典靖州治份中宣和己亥上舍釋褐循州錄事參軍敷中甲辰進士第高廟龍飛策士於淮海忠簡公以直言擢殊科益寵厥家其後大理寺主簿鎬知蒲圻縣籍相繼登第秋舉殆無虛榜他姓莫敢爭衡公於忠簡雖從姪而年相邇同事蕭先生楚學春秋俱號高弟自公之祖已貢於鄉公當弱冠侍其父赴大比試父升而公黜公喜曰吾固不欲父子同薦妨他人自是才名章章人謂一第可唾手取迨年四十始上春官又二十五年當乾道己丑乃以特奏名對策萬餘言唱名入高第初補將仕郎類試中選授迪功郎靜江府司戶參軍帥守張敬夫儒宗吏師不輕許可咨公以府事潔廉正平閩府稱美滿一歲謝去敬夫曰君力尙壯何去之果公曰某昔銳意亢宗今蹉跎至此姑欲應京秩格爲門戶計耳敬夫不能奪賦詩餞之改承務郎致仕時淳熙四年四月也疊值德壽宮慶壽恩十年賜緋衣銀魚十三年轉承事郎賜服金紫壽皇內禪轉宣義郎蓋家居優游者十有六年紹熙三年十月二十七日以疾卒享年八十明年九月壬午葬縣之儒行鄉仙壇嶺母塋之側治命也公諱昌齡字長

彥曾大父諒將仕郎娶臧氏大父方中娶歐陽氏父仔母羅氏生公九年而沒遺言勉公學公泣而誌之終身焉事繼母劉氏解氏俱盡孝解先適黃氏有女嫁公從弟生子棟而寡公收恤教育使有成立紹興己卯慈寧慶典解封孺人創及老堂忠簡公爲之記家故貧銖積寸累不憚苦節獨於賓祭致厚族姻不能自存者周急無少靳自幼至老學日益富每著書援證古今是是非非下筆不休喜藏異書手自讐校有文集五十卷娶朱氏先一年卒四子長椿季根早世曰柢曰枸四女存者亦兩人張沅劉之瀟其壻也孫男曰芡燠女許歸歐陽瑩余與公游久矣姪繹實娶公仲女不幸偕亡而公念舊弗替年過八十猶歲以詩文遺余大篇小楷少年者自謂不及公今已矣來請銘其可辭銘曰

而孝於親及宗姻而儉於身豐祭賓少而篤學老益勤仕焉遽止晚乃榮初終誰毀譽則聞謂銘不信諏鄉評

宋故連州彭使君

堯輔

墓誌銘

慶元二年三月

慶元元年冬連州使君彭道夫以病臥家士大夫問訊者輒擊袂屬惟恐其不亟瘡也十二月二十八日竟不起疾於是弔客數倍於前識與不識皆咨嗟太息以謂道

夫謙飭而和明敏而恕宜光顯於世乃止二千石宜至於耄耄乃五十九而止是何命不副才仁不畀壽也葬有日道夫之弟堯弼泣而請曰始叔父南安公未有子嘗子堯弼叔父有子乃歸賴吾兄教育成立且盡推祖產與我今無以報矣願聲之銘詞以著厥美予聞書曰惟孝友于兄弟施於有政士大夫所以愛重道夫抑有由也則叙而銘之彭氏世家吉州之廬陵道夫諱堯輔曾祖皇任朝奉郎贈左正議大夫諱衍妣碩人蕭氏祖皇任左朝請大夫尙書戶部郎中總領湖廣江西京西財賦贈金紫光祿大夫諱合妣文安郡夫人劉氏通義郡夫人李氏大寧郡夫人曾氏蘄春郡夫人黃氏父皇任右迪功郎南雄州保昌縣主簿贈奉直大夫諱楚老妣恭人劉氏道夫以戶部致仕恩補將仕郎隆興二年試文魁南銓擬右迪功郎柳州馬平尉簿桂帥中書張舍人孝祥數委以事每稱其能去爲靜江府司理參軍用舉者升從政郎淳熙元年移贛州錄事參軍獄囚危有志罪不當死鄰郡貢士黎實爲仇家誣以當死提點刑獄皆欲殺之至盛怒臨道夫道夫堅持不可卒直其枉官軍捕茶寇間俘平民道夫卒平反之他不以權勢移之爲囑託私者尙十餘事薦章交上四年

又言致事七年即贛之石城縣諭歲爲部使者以私意劾免時留丞相作州誦言非

宰使者尋悔悟謝他日言官亦以是擿其過道夫遂起知江陵府枝江縣在水中央
歲罹巨浸乃用工二十四萬大爲隄防水不能齧又以招糴易和糴四境帖帖則葺
縣庠教養生員仍卽三鄉各立小學士民歌舞之十五年賜緋衣銀魚紹熙元年通
判興國軍舊科黃河埽岸衣絹其後均之正稅正錢六千五百道夫力言於本路轉
運林湜爲裁其數正準五千而以漕計代輸其餘人兩賢之綱馬道出屬邑之永興
敷芻糧擾甚道夫請括逃用充其費縣大治三山產鐵爲私鑄窟奸盜雲集道夫請
調江州軍二百人駐漳源樊口其徒遂解散四年造朝留丞相適當國進擬道夫知
連州陞辭論天下平治日少願毋玩目前之安因及枝江義勇差役興國私鑄上皆
嘉納積官至朝散大夫妻宜人黃氏先十年卒三男岳迪功郎新監潭州衡山縣戶
部贍軍酒庫臣當以蔭補官臣尙幼三女長適從事郎袁州司理參軍康奭之次適
修職郎新郴州桂陽縣主簿董九成季未行孫澂女一其葬用二年三月丁酉地在
本縣高澤鄉義秀山之原初道夫之生戶部赴召道夢神人告以得孫戶部異之五
歲能讀書十五喪父哀毀如成人事大父諸叔孝敬盡禮踰冠入仕已能持心近厚
及臨事則毅然有守未嘗苟且故所至多可紀藏書數千卷集前言往行以爲軌範

善與人交尤尙義周急故居鄉無間言銘曰

五常之教兄友在中或鬪於牆惟貨之從怡怡道夫幼孤匪富仲也未歸先疇畢授才能孔多念慈則那鄉評謂然以勸其他

京西轉運判官方君

崧卿墓誌銘 慶元元年

故人林枌子方才高而守正吏事號強明其守信州稱上饒宰方君季申不容口時淳熙丙申歲也子方嚴於取人予常記之後十五年奉祠歸廬陵季申適來守見其決事如流往往飾以儒雅庭無留訟刑罰日清凡米運力勝皆罷其算歲省八邑自解錢數萬緡大蠲積逋以寬民力而用自足郡庠故存歐陽文忠公祠他無所問君卽後圃刑六一堂繪像以事其先塋在屬邑瀧岡下令尉捧葺之又哀公翰墨及集古錄歐蹟刻示四方皆前人未嘗及者及君去後閱三守人人爲予言凡疑獄滯訟經方君剖決者一字不可易其政如此予每誦言子方知人子方知人今豫章牧右文殿修撰蔡公戡狀君遺事且道其子之意屬予以銘其何可辭君諱崧卿季申字也九世祖自光州固始縣徙家興化軍族系日繁曾祖早祖淵皆不仕父憲文林郎有恩州湯工縣令後贈朝議大夫陽江卒七月而君生稍長能自力於學登隆興癸

未進士第試教官中之以左迪功郎爲紹興府府學教授未赴丁所生母張宜人憂
乾道丙戌起家湖廣總領所幹辦公事秩滿升從事郎賞循文林郎添差淮西安撫
司准備差遣會省員徙兩浙路轉運司屬官積營造功循修職郎用薦者改奉議郎
知上饒縣初葉丞相顯著治縣法一編世服其能君其壻也能遵行之縣凡七十二
都保正副百四十人君令旬分四番番三十五人迭詣縣受約束皆給走歷有故或
追呼批歷授之無則奉歷而退人既不勞事亦隨舉保長則揭示當輪之戶及其數
五日一集出納明白上下簡便先是督鄉司具民之物力高下毋敢不實封文書案
間遇當役者爭承則啟封參攷親加詰問情僞立得人欣然就役常平使者潘時以
名聞召赴都堂審察通判明州壬寅秋旱守委三倅分行六邑荒政君主奉化象山
獨無飢民定海縣鳳浦沈窖二湖久爲浮屠氏擅其利民乏灌溉君適被朝命一切
正之乙巳春選知無爲軍未上改南安軍肇新貢院條教簡嚴郡人祠君於學積官
朝請郎會壽康皇帝登極轉朝奉大夫諸司奏臧最入對論監司當隨所見按吏今
乃牽引他司交章以爲驗不幸出於私冤何自伸願禁其弊上嘉納焉紹熙元年春
除知吉州以大治用招軍賞特遷一官二年擢廣東路提點刑獄三年徙廣西轉

運使判官軍大講鹽筴會計更法之後諸郡實貨莫干漕司歲得若干畫十二條上之且曰本路民困矣乃椎剝以餉武昌又助靖州是謂瘠己以肥人請裁其數躬冒炎瘴徧行湘衡欽廉鬱林貴柳等州諏詢其利病將復告於朝會得渴病求奉祠朝廷閱其勞以京西風土高爽易漕優之四年秋道長沙予適在焉留語終日君以渴爲憂明年三月二十五日竟不起享年六十積官朝請大夫歸葬本軍瀨溪祖居之東原蓋慶元元年正月壬午也妻葉氏封宜人二子直孺信孺皆將仕郎君風神警邁議論過人才具恢宏善治盤錯他人劫劫已常休休至於薄物細故皆經理有法度博觀載籍因流汭源不極其本弗措也築聚書堂聚書四萬卷手自讐校尤喜韓昌黎文爲舉正十卷附錄五卷晚別成箋校十卷奧篇隱帙搜求殆徧時時發明韓公爲文之本意非但志其所出而已在南安續橫浦集至京西補襄陽志之譌謬甚多詩文辨麗略無陳言二子類爲家集二十卷嗟乎以君之才使仕於朝掌邦計脩牒史無不可者而周流郡國粗試所長迄無以大顯於世可惜也爲之銘曰

游夏淵源由求果藝古難兼之况乃後世彬彬季申少自刻勵兩邦三路有政有惠宜登史闡宜贊邦計未盡所長胡疾而逝吉民去思永矢弗替寫諸銘章以表幽竊

宗室淡然居士

公衛墓誌銘 慶元二年

唐虞成周同以睦俗治天下而禮樂之教爲急卿士多世胄國家賴之由漢迄唐雖存屬籍遠則無紀祿亦弗及信厚微矣本朝聚宗族於京師優給奉稍冠昏喪祭皆爲之節人人自重不見過失分派聯名萬葉可考如是百餘年至於裕陵世繫蕃衍始擇才者出而用之未仕不間戚疏計口給廩內則治以宗官外則掌以尊屬今又百餘年賢才日衆仕宦徧天下視尙書周禮所載或過之無不及者尙何有於漢唐惟魏悼王曾孫安化軍節度使高密侯克整其配曰普寧郡夫人王氏側室曰馮氏後封眞寧郡太君是生金紫光祿大夫叔昭娶建安郡夫人張氏生成忠郎監潭州南岳緒之有子曰公衡字平仲母孺人張氏所生母金氏靖康之亂舉族南渡日益貧窶南岳府君抱疾九江君年十五徒步迎醫數百里外府君竟不起既葬無以自給乃奉張夫人依諸父於豫章之進賢縣食孤遺俸母子相與爲命者數十年夫人七十九而終君居喪盡禮內行彌飭邑官皆來致敬君杜門不妄交惟聞人急難不以蚤莫赴之里有疾疫倡率豪右躬爲療治篤厚誠信見謂可托生死少喜黃老不事科舉泛觀經史百氏手不釋卷壽康皇帝登極補承信郎今上覃恩轉承節郎命

下嘆曰君恩不敢辭毋以干祿可也自號澹然居士作山居詩見志慶元二年夏疾作推其五行曰吾死矣戒家事甚悉四月丁卯誦有生必有死早終非命促之句端坐而逝享年五十有九娶周氏鄉先生丕遠女山房李氏之甥年三十九前君二十年卒四男彥演從政郎常德府司法參軍彥漳文林郎福建路轉運司主管帳司彥法修職郎吉州司戶參軍彥沃未命一女適傳儔孫男四人樵夫稅夫栝夫權夫孫女二人皆幼諸子以是歲七月丁酉葬君縣南十五里歸仁麻山之原夫人耐焉使來乞銘予聞君夫婦奮躬躋勤一意教子其所從師慕君賢行樂爲訓導不問束脩有無而彥演彥漳彥法亦通敏好學師逸功倍遂同登淳熙丁未進士第予官湖南彥演彥漳皆常爲僚迨歸廬陵彥法奉君官舍以是熟知其賢乃爲推國家教養之法公族之盛然後銘君之美焉銘曰

其爆彬彬其韞振振事觀愛而欽接物和以仁維德之成維仕之屯維年之不羸維子孫之興

平園續稿卷第三十一終

周文忠公全集卷七十二

宋廬陵周必大著

邑後學劉峙重刊

平園續稿卷第三十二

墓誌銘

廣南提舉市舶江公

文叔墓誌銘 慶元二年

紹熙甲寅五月戊辰前提舉廣南路市舶江君文叔卒於家以今年正月壬寅歸窆其子公實等以尙書郎黃君唐所狀行實來請銘昔君侍父尉贛之寧都與予兄弟傾蓋如故自是熟君文行閱四十年情誼日親而君介弟立叔再壻予家銘君宜也君初諱澄字清卿後改今名上世洛陽人十一代祖承清爲福州福清令因家侯官縣曾祖聞祖先俱不仕父洵直與叔父達同貢京師達登宣和六年進士第洵直特奏名入官終脩職郎南安軍南康縣丞累贈奉直大夫母恭人葉氏紹興甲子兼科取士君年十七以春秋舉於鄉其後連薦丁丑春遂中甲科補左迪功郎以父丞南康調雄州州學教授丁內外艱徒步護柩二千里人稱其孝服闋爲靜江府教授大新學舍增市田五百畝生徒雲集帥張孝祥雅重君去鎮日餞客滿座酒闌索贈言

相規君曰舍人文章政事獨步一世加以持重則大用矣僚友愕然張不懌而起明日召君握手曰始聞君言實不能堪久之方悟平生失處正坐是因共載累日留詩爲別用舉主升左從事郎修鬱林州教授鄰境兵將忿爭走訴外台提兵假道縱部曲掠奪州人奔避君諭以禍福迄不敢肆郡有冤獄理掾不肯言君白其冤部刺史二千石薦削交上改宣教郎復充沅州州學教授秩滿通判建寧府監淳熙十五年解試剗革宿弊迄今以爲法屬邑運鹽取贏佐州用舊政吝本錢不予郡邑交病君多予之於是兩濟太守鄭尙書丙政尙嚴君贊以寬纔八閱月避親易通判泉州兼南外宗正丞賜緋衣銀魚前守移疾政多底滯君攝事決遣如流合郡翕然大商王元懋因押解例輸白金君峻却之今資政殿大學士黃公洽於鄉人不輕許可時爲參知政事數誦言君之賢十三年擢使南海越明年視事舊例舶舟溺風濤者抑子孫續其業人以爲苦君首列於朝詔刊其籍舶貨益通課以最聞在官二歲未嘗私市一物被疾求主管建寧府武夷山冲佑觀積官朝奉大夫享年六十有七其塋在本縣白沙前坡之原妻宜人黃氏同郡保義郎鏞之女二子公實迪功郎南安軍司戶參軍公宜將仕郎皆嘗試禮部愿恪有父風三女長適進士陳公球次適承直郎

監建寧府合同茶場陳峨季未行孫男四人昌孫于孫廣孫繼孫女三人君清明溫粹濟以諒直少從鄉先生問學傑然出於衆既仕益自刻勵聲譽昭晰平居未嘗失色於人臨事則志不可奪每誦馬少游鄉里目爲善人之言終身行之故其涖官居家略無玷缺友愛立叔琢磨至再亦登第前君四年卒銘曰

瑟彼璠璵琢爲圭璋不薦清廟而使炎方斂其光輝黃壤攸伏更千百年尙潤山木

譚宣義

孚先墓誌銘 慶元二年

廬陵郡統縣惟八永新爲大西界湖湘壤沃地偏民生自足間遇水旱疾疫凡邑之大家分任賑恤之事某家發廩某家給薪芻某家藥疾者某家瘞死以是流殍稀鮮縣官惟勸分賞必首及之君子喜其近古惟譚氏儒術起家好善樂施至宣義君復合前美事終身行之古人以爲難去年春得疾卒其家乞行狀於煥章閣待制誠齋楊公而謁予以銘昔我先大師秦國公暨我伯父金紫光祿大夫與君伯父朝奉郎贈中大夫諱觀光同登政和八年進士第世契之敦義不得辭然誠齋之文美矣盡矣不可以有加矣姑第其家世始卒如左君諱孚先字信仲世居永新曾祖一華不仕妣大孺人段氏祖諱傑累舉入官終承事郎賜緋魚袋贈朝奉郎妣安人龍氏尹

氏其長子中大夫也次子諱觀復實君之父妣尹氏君孝以事親仁以恤下勤於學而勇於義尤切切教子曰煥曰潤繼賓於王淳熙癸卯該膺長樂慶壽恩封承務郎自是十年間歷值三朝大慶四遷爲宣義郎賜服朱銀築榮壽堂日與親賓燕樂侈上之賜士大夫爭咏歌之其卒實慶元元年三月壬子也享年八十八娶林氏成忠郎高之女封安人賜冠帔五子煥今爲從仕郎帥襄陽府司法參軍潤潭溥源並力學四女王揚烈張潞顏世忠張湘壻也孫男三人康叔同叔正叔女四人同叔名在南宮不幸早世煥等二年十二月丙申葬君縣之思賢鄉蘆峯之原銘曰

起家固難保之尤難積善有慶其居也安不虧於功不替於義以昭令名永詔來裔

彭元亨墓誌銘 慶元二年

慶元改元正月辛亥安福彭君以疾不起卜明年十二月庚申葬縣南十里某鄉某原前兩月其子經衰絰踵門出左司員外郎李君謙書一通及大學博士湯君璫所狀行實以銘爲請左君之言曰淳熙乙巳某尉安福聞彭君樂易信於鄉里會歲大侵郡督勸分君產中下首發廩爲倡乃克有濟某以是嘉其人授以著作郎呂君祖謙辨志一編蓋自洒掃應對推以應物細行之矜達於大德凡前言往行次第畢載